

Estrasburgoko OVHren datu zentro batek su hartu duenean, hodeiek su hartu dezaketela ikusi ahal izan dugu. Europako eta munduko enpresa eta hornitzaile batzuei zuzenean eragin die ezbeharrak.

Horrelako datu zentro asko dago, OVHk berak 27 ditu, horietatik bi heren, Europan. Datu zentro bateko parte txiki batean laurden bati eragindako suteak izan duen eragina ikusita, azpiegitura horiek duten garrantziaz ohartzeko balio beharko liguke. Eta, bide batez, betierekoak diruditen gauzak bat-batean desager daitezkeela gogora ekarri.

Beste era banatuago batean egin zitekeen akaso, baina datu zentroen bidez osatzen joan gara Internet. Eraikin horietan daude gure datuak, argazkiak, mezuak... Gune horiek behar duten energia, sare azpiegitura, hardwarea, softwarea, pertsonak eta ezagutza non/nola/zertarako... galdetzeko eguna ere bada —eta horri lotuta, burujabetza—.

Batzuek burujabetza nazionalarekin lotu nahi dute soilik, baina hori ez da nahikoa, legeek eragin ezberdina izan dezakete horretan eta batzuetan propioa akaso ez du zertan hoberena izan behar burujabetza ikuspuntutik. Zer esan legeak zure esku ez daudenean... Aldiz, teknologiaren burujabetzaren atal garrantzitsu bat azpiegitura horiek kontrol publikoaren bidez edo interes publikoaren mesedetan kokatzea izan beharko luke. Are gehiago, oraindik: interes publikoak akaso ez du balio, botere publikoen interesak publiko izatetik urrun egon diren kasu asko dago eta. Euskaltelen kasuan, adibidez, sare azpiegitura eta bere zerbitzu egiturak publikoki sustatuak izan ziren. Inbertsio publiko izugarriaren ondoren, pribatizatu eta jeltzaleen erabaki politikoak tarteko, putre funtsen esku utzi zuten, gehiengoa galduz. Bidean, langileen lan baldintzen okertzeak eta kaleratzeak, diru publikoaren xahutzea eta kudeatzaileentzako bonu banaketa izugarriak izan ziren. Emaizta, honakoa: enpresa errentagarri baten eta sare azpiegitura ezinbesteko baten desagerpena, bere benetako balioa baino askoz gutxiagogatik oparitua.

Hodeiek, noski, su hartzen ez dutela badakigu. Hodei bat izatetik urrun, Internet materiala ere bada. Bere zerbitzariez, sareez, azpiegiturez... gain, pertsonak eta horien ezagutzak, helburuek, legeek, erabakiek egiten dute, eta maila horietan guztietan dago burujabetzara eta interes komunera hurbiltzeko edo urruntzeko aukera.

Hodeia sutan Berrian argitaratu zen lehenik:

<https://www.berria.eus/paperekoa/1878/029/002/2021-03-13/hodeia-sutan.htm>

Zabaldu:

- [Click to share on Twitter \(Opens in new window\)](#)
- [Click to share on Facebook \(Opens in new window\)](#)
- [Click to share on Telegram \(Opens in new window\)](#)
- [Click to share on Pocket \(Opens in new window\)](#)